



JALAN PENGHUBUNG... Datuk Patinggi Abang Johari Tun Openg, mendengar penerangan mengenai pelan pembinaan dan penyiapan Jalan Sungai Maong ke Segedup, sempena Majlis Pecah Tanah Pembinaan dan Penyiapan Jalan Sungai Maong ke Kampung Segedup, Batu Kawa, di Kuching, petang semalam. Turut kelihatan Tan Sri Datuk Amar James Masing, Dato Sri Fadillah Yusof, Datuk Julaihi Narawi dan Prof. Datuk Dr. Sim Kui Hian. • Foto: AWANG KUSHAIRY JUNAIDI

Projek jambatan tetap diteruskan

KUCHING: Kerajaan Sarawak akan meneruskan pembinaan kesemua projek jambatan di negeri ini yang telah dibatalkan oleh Kerajaan Pakatan Harapan (PH) sebelum ini menggunakan peruntukan sendiri.

Ketua Menteri, Datuk Patinggi Abang Johari Tun Openg berkata, namun Kerajaan Sarawak mungkin boleh mencadangkan kepada Kerajaan Persekutuan memberikan lebih peruntukan bagi projek infrastruktur lain di negeri ini pada masa akan datang.

"Pembinaan jambatan di Sarawak akan tetap diteruskan menggunakan dana Kerajaan Negeri sendiri.

"Kita tetap akan meneruskan apa yang telah kita laksanakan kerana

jika tidak ia akan melambatkan lagi proses menyiapkan kesemua projek tersebut," katanya ketika ditemui pemberita selepas menghadiri Majlis Pecah Tanah Projek Jalan Sungai ke Segedup di Kampung Segedup di sini, semalam.

Tambahnya, Kerajaan Sarawak juga tidak akan meminta Kerajaan Persekutuan untuk mengkaji semula projek tersebut kerana ia hanya akan menangguhkan semua proses pembinaan yang sedang dijalankan.

"Kita mungkin akan mencadangkan kepada Kerajaan Persekutuan memberikan lebih banyak peruntukan untuk projek pembangunan negeri ini yang akan datang.

"Mengenai jumlahnya, ia bergantung dengan apa mereka berikan

kepada kita, selain itu kita sudah mengusulkan projek pembinaan di bawah Rancangan Malaysia yang akan datang, jadi ia akan memberikan lebih manfaat kepada kita," ujarnya.

Pada 2018, Kerajaan Persekutuan di bawah Pakatan Harapan (PH) telah membatalkan pembinaan beberapa jambatan yang telahpun diluluskan pembinaan oleh kerajaan terdahulu di bawah Barisan Nasional (BN).

Jambatan berkenaan ialah jambatan Batang Rambungan, Kuching; jambatan Kuala Kemena, Bintulu; jambatan Muara Lassa, Mukah; jambatan Batang Saribas, Betong; jambatan Batang Krian, Betong dan jambatan Batang Paloh, Mukah.